

صباح الخير جميعاً،

حضرات النواب، حضرة الأب سليم دكّاش، رئيس جامعة القديس يوسف، الزملاء،
والشباب المشاركين والمشاركات،

سعيدة جداً بوجودي هون اليوم باسم مؤسسة فريدريش ناومان للحرية – مكتب
لبنان، لنختتم سوا النسخة العاشرة من محاكاة البرلمان اللبناني.

التثقيف السياسي جزء من برامج المؤسسة وما ننظرله على انه رفاهية، او شي
جانبي لكن هو ضرورة أساس أي نظام ديمقراطي حقيقي. بلبنان، الشباب عم يعيشوا
وسط أزمات متلاحقة، وعم يدفعوا ثمن قصص ما تشكلت نتيجة خياراتهم. من
هون، منشغل لنخلق لهم مساحة يفهموا من خلالها السياسة مش كشي بعيد ومعقد،
بل كأداة ممكن يستخدموها ليغيروا واقعهم.

محاكاة البرلمان (MYP) ما كانت يوم مشروع سهل. طورناه خلال سنين صعبة،
بأزمات سياسية، اقتصادية، وحتى أمنية. بس الحقيقة الوحيدة اللي كانت دائماً
واضحة قدامنا، واللي كانت ضوّ بهالعتمّة، هي إيماننا العميق بالشباب اللبناني.
إيمان إنو إذا أعطيناهم الأدوات الصح، والدعم المناسب، بيقدروا يعملوا فرق.

السنة الماضية كنا بمرحلة شغور رئاسي، فبنينا البرنامج حول انتخاب رئيس
للجمهورية ضمن برلمان الشباب النموذجي ونجحوا الشباب المشاركين بهالمهمة.
وهالسنة، ارتكزنا على مبادئ خطاب قسّم الرئيس جوزف عون، واخترنا مشاريع
قوانين مستندة لـ **البيان الوزاري** والإصلاحات الأساسية المطلوبة. ركّزنا على
قوانين مرتبطة مباشرة بحاجات الناس وبالنقاش العام: إصلاح القانون الانتخابي بما
يتعلق بحق المغتربين بالتصويت، استقلالية القضاء، إعادة هيكلة القطاع العام،
وترسيم الحدود.

MYP هو مش بس تدريب على مسار التشريع، هو تمرين على الأمل، وعلى
التفاوض والشاركة، وعلى إنو العمل السياسي ممكن يكون شفاف، منظم، ومنفتح.

نحننا بالمؤسسة، منآمن إنو التغير ما بيصير بيوم، بس ببيلش بخطوة. وإنتو اليوم
أخذتوا هالخطوة، وبيكفي تنقلوها لبرا، على الجامعات، الأحياء، الشوارع،
والمستقبل.

باسم فريق فريدريش ناومان، بشكر كل من ساهم بنجاح هالمحطة: الشركاء بجامعة
القديس يوسف، حضرات النواب وممثلين الأحزاب السياسية، المدربين، وكل طالب
وطالبة آمنوا بالمشروع.

ألف مبروك على نجاح المشروع سنة بعد سنة وبالتوفيق لكل نوابنا الشباب بجلسة
اليوم، وشكراً من القلب.

وبتمنى إنو يكون لقاءنا المقبل هون كمان، بس بمجلس فيه نواب فعليين منكن.